

BON DIA *Aruba*

bondia.aruba@gmail.com

Riba Dia di Betico

Mas cu 1.200 hende a bishita Museo Arkeologico y expo “Rancho”



ORANJESTAD – Un di e sitionan hopi bishita diamars ultimo den cuadro di celebracion di Dia di Betico tabata Museo Arkeologico. Sra. Arminda “Vivi” Ruiz tabata masha satisfecho pa e acogida cu Museo Arkeologico y tambe e exposicion temporario “Rancho” tabatin cerca e publico en general. For di tempran, publico tabata para wardando ora cu e museo

ta habri su portanan. Esaki a sosode un tiki mas tempran di loke tabata programa, ya cu tur e personal y boluntarionan tabat’ei cla pa atende publico. Ta ser calcula cu den e prome ora nan tabatin mas of menos 400 hende, y ora cu nan tabata cla pa cera banda di 2’or atardi, sra. Ruiz ta calcula cu entre mil pa 1200 hende a bishita Museo Arkeologico y e expo “Rancho. Esaki ta e mesun cantidad di hendenan cu normalmente nan ta ricibi riba un 18 di maart. Arminda Ruiz ta declara cu museo arkeologico ta hopi contento pa e resultado satisfactorio aki. Sra. Ruiz ta kere cu e programa di exposicion “Rancho” a atrae hopi publico di e bario mes, pero tambe hopi hende cu no ta di Rancho. E ta compronde cu tanto Museo Historico y e actividad di pustamento di boto di miniatura tambe tabatin un bon acogida. “Awe Oranjestad ta wordo bon bishita”, asina orguyoso sra. Ruiz a declara.

E ta bisa cu e comentario general cu nan ta ricibi for di e publico cu ta bishita pa prome biaha e instalacion moderno di Museo Arkeologico ta: “Mi no por a kere cu na Aruba nos tin un museo asina”. E ta bisa



cu pa nan ta un orguyo, ya cu nan ta un team chikito y hopi dinamico no solamente pa habri museo pero pa mantene e museo manera cu e ta actualmente. E ta kere cu un museo mester tene e acogida general di pueblo di Aruba, y pueblo di Aruba mester sinti nan mes orguyoso di por tin un museo di e caliber di Museo Arkeologico. “Mi ta kere cu tur hende mester bisa otro, hende bisa bo famia cu ta bin di afo, pero tambe bo bisiña”, asina Ruiz a bisa.

Nos ta un poblacion di mas cu 100 mil habitante, “y mi ta kere cu nos mester haya 100 mil hende na Museo Arkeologico den e curso di aña cu ta bin”, asina Arminda Ruiz a declara na Bon Dia Aruba.

